

重史臣曰南袞以文學自任喜獎後進嘗為全羅道觀察使到海南見衢
製述大加褒美衢之文名遂播京外至是衢獄之起朝論方欲刻治以逮
李紆而袞之周旋救解如此○平安道平壤甌山祥原雨雹雲山德川
价川寧邊雨雪○辛亥平安道甌山祥原雨雹○忠清道延豐稷山地
震○夜南方天際有氣如火○壬子承旨尹啟弼金希壽啓曰去夜四
更日官來報云南方有赤氣甚異臣等起而視之果有赤氣浮空若炬
火然將滅將熾熾而若滅或南或東若進若退莫有其常至為驚愕也
朝又問日官則云自初更至五更猶未止也傳曰近來災變如地震日
月星辰之異連不止而今又有此變予甚懼焉○癸丑 御朝講司諫
蘇世讓論文瑾事 上曰瑾以宰相而已見貶降亦必知戒領事金詮
曰臺諫至今論啓豈無所聞見當先從世讓曰尹衢事已教照律卜相
重事實關安危衢退而謂儕輩曰吾誤啓矣云則必非無情而然也雖
細微之事盡錄於日記而漏而不書其有情明矣請詳悉推鞠掌令蔡
忱亦啓之其時承旨請並推之 上曰予窮竟其情之有無則當用刑
杖故問于大臣而使之照律且日記重事而其一時注書有空張不書
此甚綢繆故並令推之耳世讓曰言語間或有差失之事則已其時大